



**Ujaqqanik pinneraasiassanik annikitsumik aatsitassarsiornermik tunngaveqartumik kalaallit ujaqqanik pinneraasiaannik avammut tunisassiornerup ineriartortinneqarnissaanut periarfissanik nassuiaasioqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Nassuiaat ujaqqanik pinneraasiassanik kalaallit tunisassiaannik avammut tunisassiornerup akimmiffiinik periarfissaanillu aamma allaatiginniffioqquneqarpoq.**

(Inatsisartuni ilaasortaq Aqqaluaq B. Egede, Inuit Ataqatigiit)  
(Siullermeernera)

Demokraatit siunnersuummi isuma tunngaviusooq tapersersorpaat, Naalakkersuisut ujaqqat pinneraasiassat tunisassiaralugit periarfissat pillugit nalunaajaasiornissamik piumaffigineqassasut suliffiaqqat aatsitassarsiornermi periarfissaat tunngavigalugit.

Avammut tunisinermik sutigut tamatigut periarfissiisoqartillugu, tunngaviusumik tapersersuisarpugut, aningaasatigut isertitassanik pilersitsisarmata, taakkualu assersuutitut taaginnarlugu suliffissaaleqinerup appartinniarnissannut atorpeqarsinnaammata.

Tamanna oqaatigineqareersorlu, taamaattoq pisariaqarpoq erseqqissassallugu, siunnersuusiortup avataaniik aningaasaliiniartunut ingalassimaniartutut pissuseqarnerat isumaqatiginnginnatsigu. Toqqaannartumik oqaatigineqanngikkaluortoq una tunngaviginiarneqarpassimmat, maani nunami naammalluortunik piginnaasatigullu aningaasatigullu piareersimasugut isumaqatiginginnatsigu, aatsitassarsiornerup aallartisarnissaa piareersimaffiginnginnatsigu.

Nunarsuaq nunarsuarmut tamarmut siaruarsimasuuvoq. Imatut paasillugu, nunatut, suliffeqarfittut aningaasaliisartutullu, nunarsuarmioqatigiinni susoqarneranik malinnaajuartariaqarnermik kinguneqartarpoq. Tunisassiorneq ilumut akilersinnaanersoq nalilerneqartuartaqarpoq. Imatut ilaatigut paasisariaqarpoq, aatsitassarsiorfissat qanorluunniit amerlatigisut aallartisarninnaavugut, akilersinnaassappatalu tunisassiasap avammut nioqputiginiarnerani, pisisussamut pilerinartuusariaqarpoq.

Ujaqqat pinneraasiassat avammut nioqputigineqarnissaat oqaluuseritillugit pingaarpoq, pinneraasiassap pinnissusia sananeqarluarsimaneralu piinnarnagu – akimigut pinneraasiassanut assingusunut unammillersinnaasariaqarmat. Allatut oqaatigalugu ujaqqat pinneraasiassat tunisassiariniarniarlugit aallartisarneqarsinnaanngillat – tunisassiap naammasseriikkap tuniniaaffissaqartariaqarpoq.



DEMOKRAATIT  
DEMOKRATERNE

Oqaaserisavut tunngavigalugit siunnersuummut isumaqataanerput nalunaarutigaarput,  
Inatsisartullu Aatsitassanut Ataatsimiititaliaannut oqaluuserineqaqqinnissaa innersuussutigalugu.